

施愚山先生余文集

施愚山先生全集

施愚山先生全集

施愚山先生全集

施愚山先生學餘文集卷之十七

傳行狀

顧與治傳

顧夢游字與治江寧人曾祖璵仕至河南副使伯曾祖
璘刑部尚書同時負盛名金陵耆舊至今並稱之父端
祥判河南汝寧夢游少稱神童十歲作荷花賦十九廩
學宮數就闈試輒病不終牘一意攻古文詞與四方名
士賢豪深相結吳人葛一龍困白門久爲治裝使歸集
詞人數十輩飲餞秦淮上歌詩送之莆陽宋珏客死無
子走數千里往哭收其遺文乞禮部尚書錢公謙益表
其墓時閩人曹學佺輯石倉十二代詩選士爭附以立

名不可得獨亟錄夢游詩刻之歎曰真詩也其聲大振
是時夢游雖諸生然名家世有生長陪京公卿大夫肩
相比皆好文辭或式廬從之游取一言爲重餽遺交屬
明亾棄舉子業會當領歲薦卒不就僧祖心憤世佯狂
與夢游爲方外交至則主其家禍發連繫刃交于頸夢
游詞色不變卒免于難其兄清早歿遺孤甫三歲鞠爲
已子旣長語及兄必墮淚親交有急或以衣付質庫中
去之如流水不復顧也生平薄家人產有洲田二頃濱
于江歲多漂沒吏索逋租無寧日至盡粥它產以償之
庚子九月二日幼年六十二一子早殤遂無後夢游善
行草書閒逸自喜賤素委積所至無少長貴賤方伎女

史皆應之晚年閉關以書易采求者成市將歿前一日
猶爲僧作大書從容如平時所撰詩文散佚歿餘其
友施閏章收輯得十卷行世始阮大鍼罷官閒居嘗以
詩強屬其序固辭不獲已不知者輒謗夢游黨惡及大
鍼起兵部尚書與馬士英用事江南脩睚眦之怨誅不
附已者所親驚歎曰使向者終靳序今不免矣或又說
夢游阮司馬雅重公願毋絕懼可咄嗟取富貴而多謝
病不造其門故以貧士終丙戌秋鍾山陵木伐移新市
者塞途獨不取尺寸問其故不答以何城閉至裂柱以
炊無悔焉

楊老癡傳

老癡姓楊氏名貞字彥恒宣城北鄉人也晚自稱老癡人皆曰老癡老癡云父宗禮兄弟五人同居相友老癡少孤篤學獨喜爲詩不干仕進顏其堂曰慈壽奉母漢陽無晨夕離出則衣短衣與農人餉婦課耕田間意有所適便朗吟清嘯不務刻琢畧似陸放翁士大夫多樂從之游成化間翰林簡討莊景聞老癡名自江浦肩輿訪之值一野老荷鋤問老癡何在荷鋤者微吟自若莊笑曰公卽老癡邪對曰然遂握手交極歡老癡嘗暮春見婁士游學有餒色吟以諷之曰山前山後子規啼聲聲叫道不如歸士應聲曰不是歸人歸不得莫聽山禽說是非老癡驚問姓名曰左輔字廷弼江西進賢人因

揖留之曰才如是乎老夫伴讀居歲餘去成進士以老
癡嘗愛古琴劍自京師致琴一劍一而老癡已卒左輔
官行人冊封海外旣返爲紆道哭祭其墓感動行路先
是御史賀某按部作憶母詩限呵字不成召問老癡輒
續之云回思拜別寒窗下凍手縫衣帶線呵賀叫絕厚
爲之禮其爲詩任真捷給多類此所居曰斗山有斗山
集藏于家又愛橫塘山水遂移家焉其地一名燕窩卒
年六十有七子綱緝世其業族益蕃今號燕窩楊氏
施子曰自余童時聞鄉人藉藉言老癡長求其事無傳
焉問其集則火矣今存詩纔數十篇朴而不野豈所謂
隱居放言者邪嘉其人爲次其軼事淵明有言今我不

愚山先生文集 卷一
述後生何聞哉于老癡亦云

按進賢志傳畧云左廷弼名輔居進賢中洲白湖嶺之支麓今名左家山族不甚蕃然世爲清門輔家貧受經伏讀間從醫者餬口于宣城人少識者偶逢敬亭老人楊先生傾蓋延接得館穀歸卽聯捷成進士授行人時官方嚴肅輔尤刻苦一老僕供汲冬寒無絮擁羊皮以臥奉使海南于屬國幣交無所受蓋廉勁篤學之士也所著有浮海集今不傳

誥贈朝議大夫禮部郎中加一級崇祀鄉賢洪公傳

贈公先生諱德常字常伯徽之歙縣人唐宣歙觀察黜陟使經綸公之後也自宋而明世有顯人曾祖金竺舉孝子祀于鄉父武卿贈承德郎先生少補博士弟子才冠其同學是時當明末天下士大夫窟穴八股摘經擬

題爲富貴捷徑有目涉經史古文者相戒爲不急務讀
不終帙輒棄去而實學益衰先生喟曰此碌碌者足爲
吾業乎文不秦漢學不程朱而自號學者雖聲聞無益
也于是倣朱子西山讀書分年法自十三經下逮國策
史記漢書盡以歲月務強記之久之胷中汨汨然不可
禦矣嘗遊西湖刻其制舉業行世一時名人葛屺瞻黃
貞父韓求仲諸公皆亟推之先生自負益竒務古學益
力嘗病汎覽寡要輯左策史漢約選一編以爲古文所
自出年旣三十研心六籍取有宋諸儒之說及明薛文
清馮恭定諸書旁攷折衷謂大易後發聖性道莫先中
庸著中庸要領又時與同學汪月巖諸耆舊數會于紫

陽一遵白鹿洞規而要歸于存誠寡過其言曰孔顏克已復禮爲仁又曰約之以禮禮愈嚴則仁益篤書四勿箴于座右且輯有周程張朱五先生學約知行合一錄養正格言變化氣質論蓋歎夫末學之無成一惑于師心冥悟而或致越閑一牽于講習訓詁而無所渙然自得其弊始于蒙養不正而浸淫決裂以遠也先生之論學如此方七八歲喪母哀慟如成人長奉父承德公命就試揚州聞父病冒風浪遄歸舟幾覆而免居父喪廬墓骨立謹事繼母兄弟友愛時有雙竹連生馴鳥就食掌中說者以爲和氣所致云讀書每至夜分體稍憊或止之歎曰一息尚存吾寧已諸旣而疾大作配許太君

羹股進少瘳又二年遂不起卒年三十有九平生著述
多賸稿殘編零落笥篋知者惜之其爲人樂易能循謹
鄉之父老子弟莫不斂手嘉服以爲仁人君子也子琮
順治壬辰進士累官禮部郎中贈先生如其官琮督學
陝西刻先生左策史漢約選頒示諸士秦中人皆知洪
氏家學仲子珣以明經司訓武進縣學餘子諸孫皆克
世其業康熙丙辰以公名德夙著推祀鄉賢事見侍讀
學士沈公行狀戶部尚書梁公誌其墓而余次爲傳以
附梁沈二公之後論曰歛洪氏蓋世有令德云余數至
郡其父老語及贈公皆亟推曰長者而撰次其行事則
所輯諸書多歸本于道德惜其早逝不仕其書不大行

于世也不有令子孰揭而張之嗟乎世之家脩躬行而
名湮沒不傳者豈少哉吾聞歛爲程朱三夫子系所自
出謂之東南鄒魯數年前余猶及與紫陽之會一聞緒
論蓋紫陽氏之風澤遠矣後之君子其相承不絕有以
夫

馬季房小傳

馬猶龍字季房廬陵城西人也弱冠穎秀美姿容初娶
婦盡出其奩爲購書杜門夜讀題其壁曰懶甚元亮狂
逾嗣宗不知者謂生狂不可近也邑中惟彭銘稍暱就
之而吉水劉孝則同升交最懽相率爲詩古文詞于是
無不知城西馬生備兵黃公承玄吳公正志郡守楊公

百朋先後延接有加禮試則冠其曹與泰和曾堯臣文
饒齊名是時先達如蕭伯懋命官蕭伯玉士瑋及端甫
大奇周季清廷旦賀可上中男周元龍開先尹長思先
覺輩爲文字交至則一坐盡傾其它士大夫非甚折節
亦不與交終其身未嘗執贄公卿之門所居廬火餽舍
蕭然終不以譏告當事崇禎丁丑春聞劉孝則擢進士
第一大笑曰孝則售我雖窮老足矣先是上方求博通
古今之士以應徵辟會侍御邢公出按江西劉亟以屬
邢及邢按郡索之堅臥不肯見人以是益高之生嘗夢
誌公啖以乾松香氣猶在口遂棄制科業一意談無生
然任達飲酒飲輒醉臥間游金陵吳越及嶺海皆以詩

自娛清新可誦所著有洛如館集年五十七一夕小飲吐血死語具劉孝則墓表中

方虎隣傳

方召字虎隣宣城人爲諸生貧蹇矢志明亾山谷兵起召輒集鄉勇號義兵久之不利聞明之宗藩有稱國閭浙間者脫身走從之授兵部司務署衢州江山縣事縣交閩越道苦驛騷官又乘亂漁利自便有急則走民益病召至誓父老寬徵斂自謂官兵曹法得戢兵禁往來騎使毋暴民毋橫索廚傳民呼真父母時清師定浙江金華府久抗不下屠其城師次江山人皆震恐召謂事已去毋徒殘民許父老迎師而肘繫其印冠帶北向

拜曰孤臣無狀以死報陛下自殺井死丙戌八月七日
也在縣僅二十九日出其尸如生咸歎曰骨冷泉香矣
今置亭井上曰冷香亭蓋縣齋之西偏也晝夜常形見
官爲位祀于署民像祀于廟左右二楔大書不愛錢不
怕死蓋其視事時常牌書此六字出則使人負以前驅
云墓在城南景星山碑曰明忠烈江山縣侯方公之墓
康熙七年同里施閨章過江山至井所弔以詩曰濯骨
寒泉迥絕塵爲全黎庶不全身誰知一月江山令竟作
千秋俎豆人邑人哀思之復乞爲之傳

劉若木傳

劉生日陽字若木宣城北鄉人父大生爲諸生知名早

卒生依母氏體羸貌寢鄉人不能識生亦不往于人獨
族弟祖琨善之嘗借書讀午夜不輟已習爲詩所居臨
溪窮蹙無事獨吟脩渚大澤間不知者以爲狂而其人
實恪謹貧甚爲童子授句讀間與郡中諸詞人往來業
日進焚其舊稿益肆力學古日有常課毋敢缺順治辛
丑冬娶某氏貌亦寢夕將婚俄中疾若斷股劇腎者不
能交禮移宿召醫醫皆愕然就醫于郡疾革載歸及門
而卒年二十有五貧不能殮祖琨爲經紀其喪其詩清
新瀏爽余嘗得數紙誦之灑然如疎鐘江岸寺細雨板
橋村葉黃山下路霜白渡頭船荒村羣鳥亂破屋一燈
昏市近魚鰕春入饌時危鼓角暮關心古杉抱閣日光

碧芳藥垂階露氣涼鷄聲一徑竹風內煙火數家梅雨
時皆警句爲人所傳然所積詩頗多歲嘗成帙或數易
稿死而零散不見其全爲可惜也日陽奉母謹旣死母
日夜哭已夢來告曰兒夙世戒僧也以心動墮此法不
當婚若不婚猶可數年活云

愚山子曰男女之際危矣哉僧以一念中墮爲貧家子
求醜女半夕婚不可得況漁色者乎世言詩能窮人劉
生獨貧天不婚以絕嗟夫其窮一至斯乎

毛子傳

毛姓蕭山人也初名奇齡字大可一字齊于曰吾淳于
髡也少與兄萬並知名人呼小毛子負才任達善詩歌